

# SARS E BATLANA LE THEKNOLOJI E TLA THIBELA BOFOKODI BA POKELLO YA LEKGETHO INDASTERING YA TSA KWAE E SENG MOLAONG

**Pretoria, Labobedi, 30 Mmesa 2019** - Ditshebeletso tsa Lekgetho tsa Afrika Borwa (SARS) di qadile ka mekutu e mmalwa le e mawala ya ho thibela bofokodi ba pokello ya lekgetho bo tswang diketsahalong tsa ikonomi e seng molaong.

Ikonomi e seng molaong e akaretsa ikonomi ya sekgukgu, e sebetsang kante ho melao le melawana ya naha ho isa le ditlong tsa molao tse hlophisitsweng, ho kenyeleditswe kgwebisano ya dihlahiswa tse seng molaong.

Afrika Borwa e na le ditahlehelo tse hodimo tsa lekgetho ya tse kenag le ho tswa ka naha ka lebaka la ho eketseha ha tsa tlhahiso, phepele le thekiso ya dihlahiswa tsena tse seng molaong. Ho sebetsana le phephetso ena, SARS e nkile mehato ya ho fokotsa diketsahalo tse tjena tse seng molaong ka ho ntlafatsa leano, ho ntlafatsa metjha le tshebediso ya theknoloji e tswetseng pele ho tshwaya dihlahiswa tsena ka mokgwa o ikgethang, ka sepheo sa ho ntlafatsa tikoloho ya phethahatso ya molao le ho netefatsa taolo ya kakaretso ya tsa lethathama la phepele.

SARS e batla ho qala ka theknoloji e bitswang 'track-and-trace' (e tshwayang le ho beha leihlo disakarete) indastering ya disakarete, e tlang ho kgontsha mokgatlo ho beha leihlo leeto lena la disakarete ho tloha ha di hlaliswa ho fihlela ha di rekiswa le/kapa ha di romellwa ka hare le ka ntle ho naha. Boiqapelo bona bo sa sitiseng letho bo lebelletswe ho ntlafatsa peholeihlo le taolo ya dikgafa le makgetho indastering ena ka mokgwa o ntlafetseng haholo.

Ho se ho phatlaladitswe thenda e mabapi le Tsamaiso ya Tlhahiso mmoho le tharollo ya theknoloji ena ya Track and Trace bakeng sa disakarete mane Websaeteng ya SARS.

Yuniti e thehilweng botjha e mabapi le Ikonomi e seng Molaong e se e qadile ka diketsahalo tse mmalwa tse matla tsa phethahatso ya molao tse seng di le mahlong a setjhaba, ka yona nako eo e ntse e tswela pele ka diphuputso tse ding tse ntjha le tse etsang nalane tikolohong ena ya tsa Phethahatso ya Molao.

Bakeng sa dipatlisiso: Ikopanye le sarsmedia@sars.gov.za kapa Sandile Memela at 082 8003750.